

1. I krieg a Ganslhaut wänn i hör: *Friara is äll's besser g'wesn*,
i hãb Ängst vor Gutmenschen und no' mehr vor de Bös'n,
I fiarcht mi vor'm *Tsunami* und vor'm *Supergau*,
i hab Ängst vor'm *Karl Heinz Grasser* und vor seiner Frau.

De Ärmen krieg'n immer weniger, de Reichen immer mehr,
i fiarcht dass i, wänn's so weitergeht bald zu de Ärmen g'hör,
Geht's da Wirtschaft gut, geht's allen gut, i fiarcht, dass des nid stimmb,
und, dass nãch der 3. Staffel vo *Starmania* no' a 4. kimb.

Ref. Vor dem fiarcht i mi, aber no' vü mehr, fiarcht i mi vor'm Friseur!

2. I hãb Ängst vor wilde Kãtzen und vor wilde Hund',
da *Papst* der soid unfehlbar sei', i fiarcht, dass des nid stimma kunnt,
i fiarcht de, de nach oben buckeln und nãch unten treten,
unter der Woch' sands wia da Teuf'l und am Sonntag gengerns beten.

I hãb Ängst vor'm Terror, aber i find's voll verkehrt,
wãnn ma si gegen Terror mit Gegenterror wehrt,
und wenn im Namen Gottes Kriege g'führt werd'n –
wia kãnn a Krieg denn heilig sei' - kãnn mir des wer erklär'n?

I kenn vü Leut de was drauf hãb'n und wãhrscheinlich nix erreichen,
so Typen wie da *Westenthaler* krieg'n des *goldene Ehrenzeichen*,
i krieg Angst wenn i ma å'schau wer im Nationalrat aller huckt,
i fiarcht mi vor dem Verruckten der de Ortstafeln verruckt.

I fiarcht Antisemiten, aber a radikale Rabbi's,
i hab Ängst vor da *Vera Rußwurm* und vor de *Teletubbies*.
I fiarcht de, de öffentlich Spenden, dafia zahl'n's dann koane Steuern,
i hab Ängst ver denen de Weihnachten auf *Gut Aiderbichl* feiern.

Ref. Vor dem fiarcht i mi, aber no' vü mehr,...

3. I fiarcht de Opportunisten, de immer nur ihr Kreuz verbiagn,
und dänn des schlechte G'wissen mit Zynismus kompensier'n,
wennst was anders machst wie alle, sågn's da, dass'd a Träumer bist
und, wenns'd dänn Erfolg håst, sågn's: i håb's immer g'wisst!

I fiarcht de, de glab'm se war'n super und går nid super sand,
de auf's System nur schimpfen, åber nix dagegen dand (tun),
de sag'n de Welt is schlecht, alloa kämpfen håt koan Sinn
und i fiarcht, dass i selber genau so ein Würschtl bin!

Ref. Vor dem fiarcht i mi, åber no' vü mehr, fiarcht i mi vor'm Friseur!

Er fiarcht si vor'm Friseur
Des lieg nid an der Friseurin, des woass i gånz genau
Vor'm Friseur
De versteht mi já, des is a super Frau
Vor'm Friseur
I geh hiaz zum Psychiater und måch a Therapie,
des wås i hab, des is a Krånkheit, de hoasst: *Keirophobie*
da zähl i ihm alle ander'n Ängste auf und da muss er lach'n:
i glaub då würd'n nur Drogen helfen.
Therapeutisch kann ma då nix måch'n.